

Zaključci treće naučno-stručne konferencije o kestenu:

- Hitno *donijeti dugoročnu strategiju očuvanja šuma pitomog kestena* kako bi se očuvao ovaj izuzetno vrijedan prirodni resurs; donijeti planove za obnovu šuma pitomog kestena, njihovu revitalizaciju, kao i očuvanje genetičke raznolikosti;
- *Kandidovati i izdvojiti sjemenske objekte pitomog kestena ili sastojine, grupe stabala ili pojedinačna stabla kestena;*
- Neophodno je izvršiti *izdvajanje regiona provenijencija tj. sjemenskih zona* kako bi se realizovala odredba Zakona, posebno dijela kojim se reguliše promet šumskog reproduktivnog materijala, a koji proističe kao obaveza iz Uputstva Savjeta ministara Evropske zajednice, kao i našeg članstva u OECD šemi šumskog reproduktivnog materijala.
- *Osnivanje sjemenskih plantaža*, koje će proizvoditi kvalitetno sjeme, koje će poslužiti za proizvodnju kvalitetnog sadnog materijala i osnivanje kultura kvalitetnih tehnoloških svojstava, krupnog ploda, otporne na štetočine i bolesti, izdržljive na visoke i niske temperature, sušu itd., sa identitetom i očuvanjem autohtonosti;
- Osim *planske i kontinuirane revitalizacije postojećih kestenovih staništa*, poticati *podizanje višegodišnjih nasada kestena kao voćarske kulture* s ciljem stvaranje veće ekonomske vrijednosti i mogućnosti prerade kestena u gotov proizvod, kako u porodičnim gazdinstvima, tako i industrijskoj proizvodnji;
- Kako postoje *raspoloživa novčana sredstva za očuvanje kestenovih šuma*, bilo raspodjelom dijela dobiti iz društva koje gazduje državnim šumama bilo iz sredstava GEF-a Svjetske banke, neophodno je aktivnije uključivanje svih zainteresiranih strana a posebno institucija i viših razina vlasti u cilju zaštite kestenovih šuma i kvalitetnije gazdovanje ovim resursom;
- Da vladin sektor na svim nivoima *poveća aktivnosti na stručnoj edukaciji stanovništva* o značaju i zaštiti šuma kestena kao i njegovih produkata;
- Probuditi interes državnih institucija da se aktivnije uključe u *definisanju koncepta podrške* stimulisanja zainteresiranih udruženja, pravnih i fizičkih lica o zdravstvenom stanju kestena i značaja njegove zaštite kao i upoznavanje istih o svim drugim bitnim parametrima koji se odnose na plod i drvo kestena;
- *Još uvijek postoji mogućnost da se kesten očuva i zaštiti njegova populacijska i genetička individualnost*, ali negativan utjecaj mnogih prisutnih faktora će to ugroziti ukoliko se ne poduzmu daljnje mjere zaštite. Poboljšanje zdravstvenog stanja kestenovih šuma je dugotrajan proces u koji moraju biti uključeni svi stručnjaci, znanstvenici i operativci (uzgajanje, zaštita i uređivanje šuma) jer se učinkoviti i vidljivi rezultati mogu postići samo nadopunjavanjem i istovremenim djelovanjem metoda uzgajanja i zaštite šuma.